

## Transkription von Urkunde HAL 1345a

Ort, Datierung: Halle, 1345-05-14

Signatur: Stadtarchiv Halle, II, Urk., 33 U 1 Nr. 32 [\[online\]](#)

Inhalt: Rat der Stadt Halle an Grafen von Mansveld: Vereinbarung über Erbangelegenheiten

Wie Ratmanne vnde bürgerre tũ halle bekennen openlicken in disseme ieghenwerdegen briue , Dat die Edelen herren her Borchard Greue tũ / Mansuelt .. vn(de) her Borchard von Scraplowe herre tũ Wettin , mit vns gededinget hebben vn(de) ore openen briue besegelet hebben mit oren vn(de) ore kinde(re) jnghesegelen / vns dar ouer gegheuen hebben / dat die vorgnanten herren vn(de) ore kindere , vnde alle ore nakomelinge , vnsen bürgeren die ore man sin oder noch w(er)den / mogen scollen ligen gũt in samder hant brüderen , vn(de) brüderen kinderen , vedderen vnde vedderen kinderen , vn(de) weme sie gũt in samder hant / ligen oder gelegen hebben deme scollen sie eine samde hant halden , Wier dat sie siek , wol svnder den mit dem brode , so scollen sie on ore samde hant / nicht breken svnder ore gũt , scal steruen , von eime vp den anderen , Wier ok dat siek iemant , tũ deme gũde tũckede , die besibbe tũ deme gũde / wiere alse hir vorbescreuen is , Deme id vor nicht legen wiere die scolde on geuen tũ lünghe , von der pannen , in deme Ditzschen bornen eine / halue marc , vnde von der pannen , in den anderen bornen , alset siek geboret , so scollen sie od ome ligen , Wiere ok , dat sie iemande , wat tũ tũsprekene / hedden vmme gũt in deme Dale so sollen sie komen , vor , dat gerichte , dat tũ deme dale hort in der stat tũ Halle , vn(de) scollen dat gũt dar / winnen oder vorliesen , alse dales recht is , Ghinge der bürgerre tũ halle ienich af , die ore man wiere , oder noch werden mochte , des kinderen , vnde / eruen scollen sie ore gũt ligen , ane gaue , vnde ane hindernisse , Wolde ok orer vorgnanten man , ienich siner husvrũwen , gũt ligen laten / tũ orme liue , dat scollen sie ok den vrũwen ligen , ane gaue , Ghinge ok orer manne ienich in der stat af , des kindere vnmũndich wieren / der vormũndeschap , scollen sie siek nicht ane tũcken , Wiere ok orer manne ienich , die nicheine eruen hedde , vnde die sin gũt dũrch not / laten mũste , dat scollen sie ligen , auer die not scolde die man biwisen , vor deme Rade tũ Halle , mit twey bederuen man(n)en tũ den / hilgen , also dat is die Rat gelouede , Dat scollen die vorgnanten herren , vort gelouen deme rade , vn(de) scollen ṽp ore wũrt , dat gũt ligen / Wũrde on ok wat gũdes los , vnde wolden sie dat gũt behalden , also dat sie is <sup>1</sup> nicht vorkoften , noch vorlegen , so scolden sie dat gũt behalden / mit sodame , rechte , alset die hadde , des dat selue gũt vore was , Wolde(n) sie ok or vorlegene gũt , vor kopen oder laten , so scollen sie dat gũt / vorkopen , herren die ore geliken sin , oder hogeren , vn(de) scollen vorgnanten man nicht nederen , Vnde sweme sie , dat gũt laten , die schal den / bürgeren , die seluen briue halden , die sie on ge gheuen hebben , Ok hebben sie gededinget mit vnsen bürgeren , wie eine pannen kost in / deme Ditzschen bornen , die von on tũ lene ghet , die scal on geuen , eine halue mark , alse tũ halle weringhe is , vnde von der pannen in / der Metriten einen haluen vierdingh von der pannen in deme Hakebornen ein lot , von der pannen in deme windeschen bornen / ein half lot , Disser dinghe sint Thuge , vnses herren sone von Mansuelt her Albrecht Dũmherre tũ merseborch .. her Hinrik von / Naumborh .. her Bertold von Gozerstede .. riddere .. Thilo von Welpfleue .. vnde anderer vromer lũde genũch , Vp ein openbar or/kũnde disse dinghe , dat die stede , vn(de) ghantz , von on , vn(de) von oren kinderen , vn(de) von alle oren nakomelingen , ewiclicken gehalden w(er)den / so hebben die vorgnanten herren .. her Borch(ard) Greue tũ Mansuelt . . vn(de) her Borch(ard) von Scraplowe herre tũ Wettin / ore jngesegele an oren brief gehangen . Ok bekennen .. Greue synert .. vn(de) Greue Otke

von Mansuelt .. vnde her Borch(ard) von Scraplowe die Jünghe / dat alle disse vorbescreuenen dingh / mit oren willen vnde vñlbort geschin sin / vn(de) die willen sie mit oren vorgnanten vederen / vnsen bürgeren von halle stede vn(de) ghanzt halden / Dat bethügen sie mit ores selues Jngesegelen / die sie an den vorgnanten brief hebben gehangen Vp ein openbar bekentnisse vn(de) bethginge / alle disser vorbescreuenen dinghe / dat vns die wetlic sin / von wrden / tũ würden / alse hir vorbescreuen stet / des wie hebben / opene brieue / der vorgna(n)ten herren so hebbe wie Ratmannevnser stat Jngesegel / an dissien iegenwerdigen brief gehangen Na goddis gebort .. Dusent iar .. Drühundert iar / in deme vifvndevertigesten iare / Jn deme hilgen pinghest auende /

---

<sup>1</sup> *is* gestrichen, Verschreibung